

~~Lib. Polon.~~

1754.

Benedicti PP. XIV Breve de ^{reddendis} militibus in Regno
Poloniae debitas suis in ipsa militia pa-
tratis criminibus poenas evitandi causa
ad sacras ecclesias confugientibus.

Hist 1754.

Foris.

UNI

Intus
verò.

Foris.

Venerabilibus Fratribus Archi-Episcopis, Episcopis, cæterisque locorum Ordinariis Episcopalem Jurisdictionem in Regno Poloniæ habentibus.



(*Locus Annuli Piscatoris.*)

Intus
verò.

BENEDICTUS PAPA XIV.



33. 479. III.
 Venerabiles Fratres Salutem, & Apostolicam Benedictionem. Non sine gravissimo Apostolici animi Nostri dolore nuper accepimus ingentem in isto Poloniæ Regno frequenter accidere perturbationem inde ortum habentem quod, dum stipendio conducti Milites debitas suis in ipsa militia patratis criminibus pænas evitandi causa ad Sacras Ecclesias, & loca immunita securitati suæ consulturi continuo confugere festinant, eorum Præfecti ut in ipsos pro culparum meritis animadvertant, ex iisdem Ecclesiis immunibusque locis per vim extrahere contendunt. Fraternitatibus autem Vestris satis superquæ compertum exploratumquæ esse non ambigimus, quanta sollicitudine Nos in Suprema Catholicæ Ecclesiæ specula constituti advigilare, & adlaborare debeamus, ut Ecclesiastica Immunitas ea Apostolicæ Providentiæ ratione inviolabilis ubiquæ servetur, debitusque Sacris Templis ac locis honor ita exhibeatur, ut omnis quamvis levis occasio vis aut ausus penitus removeatur. Ea propter Vobis, Venerabiles Fratres, injungimus, & mandamus, ut in sua quisquæ Vestrum Diocæsi sub præcepto edicat Superioribus, ac Rectoribus, tum Sæcularibus, tum Regularibus Ecclesiarum. Sacrorumque locorum quorumcumquæ etiam Cœnobiorum, ac Monasteriorum Poloniæ, ne deinceps audeant per Quinquennium à die intimationis harum Nostrarum in forma Brevis Litterarum inchoandum recipere, vel in iisdem locis immunitatis Ecclesiasticæ jure gaudentibus retinere quoscumquæ criminosos Milites ut infra designandos sub pæna suspensionis, ab exercitio Ordinis privationisque Officiorum, ac dignitatum, quin, & inhabilitationis perpetuæ ad eadem, aut similia munera impofterum obeunda. Criminoli autem, quibus deneganda est hujusmodi securitas, hi dumtaxat sunt. Primum ij omnes, qui postquam se se Militiam secuturos polliciti, præmium etiam de more constitutū acceperunt, in Milites adscribi, & cooptari nolentes aufugiunt, deinde qui militiæ adscripti & cooptati, atquæ solito Militari Sacramento obstricti sine necessaria, solitaquæ venia à Præfectis obtinenda militiam deserunt, deniquæ qui jam milites violatæ bellicæ disciplinæ crimine quomodo-

modocumquè rei, ut meritum juxta militares Leges supplicium declinare valeant, transfugæ se in Ecclesiis, locisvè immunibus tutantur. Cum itaq; contigerit quemvis antedictorum delinquentium, sive consentientibus, sive dissentientibus eorumdem locorum Superioribus vel Rectoribus in qualibet Ecclesia locovè immuni confugium, præsidiumque sibi quæsisse, statuimus, ac decernimus, ut, cū Præfectus Militis, ut præmittitur, rei, hunc sibi tradendū à Præsule Loci Ordinario juridice postulatū fuerit, postulatū hujusmodi admittatur, ut extractio rei cum interventu Personæ Ecclesiasticæ ab ipso Antistite Loci Ordinario deputandæ fiat. Verum volumus, ac mandamus, ut in ipso tradendi consignandique Militis rei actu à Præfecto sive altero ejusdem nomine interveniente Authenticum de non plectendo reum morte, aut aliqua gravi pœna corporis afflictiva jusjurandū omninò præstetur sub pœna Excommunicationis latæ sententiæ adversus contravenientes Nobis, & Romano Pontifici pro tempore existenti Successori Nostro præterquàm in mortis articulo reservatæ. Cæterum exceptis iis, quos supra recensuimus decrevimusquè casibus, volumus, & mandamus, ut Ecclesiastica Immunitas in memorato Poloniae Regno illæsa, & intacta servetur juxta Sacros Canones, Apostolicas Constitutiones, & Concordata Apostolicam Sedem inter & Regem Poloniae inita, & auctoritate Apostolica confirmata. Volumus insuper, ut earumdem præsentium Literarum transumptis, seu exemplis, etiam impressis, manu alicujus Notarii publici subscriptis, & sigillo Personæ in dignitate Ecclesiastica constitutæ munitis eadem prorsus fides adhibeatur, quæ adhiberetur iisdem præsentibus, si forent exhibitæ, vel ostensæ. Interim Apostolicam Benedictionem Vobis, Venerabiles Fratres, peramanter impertimur. Datum Romæ apud Sanctam MARIAM Majorem sub Annulo Piscatoris Die V. Octobris MDCCLIV. Pontificatûs Nostri Annô Decimôquintô.

CAIETANUS AMATUS.

Biblioteka Jagiellońska



stdr0026172

hu
fti
ac
f